

तुबारि संपादकीय
टीम

◆अस इ उम्मिद करूं लगे से कि एण बाड़े रोज अन्तर सुआ मेहणु इस कम अन्तर सहयोग कते।

◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगी घाटि अन्तर पढ़ूं जे इ पत्रिका शुरु कियो असी।

◆तुबारि यक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति गलती कहेण जे नेई छपाण लगे। अगर कोइ ई सोचता बि त अस जिम्मेवार नेई।

◆छपाणे पेहेले सोब आर्टिकल दुई टाई पांगेई मेहणु हरालो असे। इ त खुलि बोक असी कि पेहली बार पांगवाड़ी लिखणे सुआ मुशकिल भुन्ती त गलती बि भुन्ती। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल ना मिले, या घाटि मेहणु के मदद ना मिले त तुबारि पत्रिका कदि बि बंद भुई सकती।

◆कोई चीज छपां असी या नेई छपां जे तुबारि संपादकीय टीम पुरा अधिकार असा।

◆अस किलाड केन्द्रीय पुस्तकालय, त बजार राखे ठेके भेण्डे हरिरामे दुकान अन्तर तुबारि ड्रॉप बॉक्स पुठ बि अपुं सुझाव त आर्टिकल रखूं जे सुविधा कियो असी।

◆अस सोबी पांगेई मेहणु जे हात जोड कइ निवेदन कते कि, तुस बि कोई अच्छा आर्टिकल, पुराणी या नोवी कथा, कहावत, कविता, त नोवे घीत (पंगवाड़ी अन्तर) लिख कइ छपां जे हेन्र दिए।

तुबारि संपादकीय टीम

☎ 9418431531

☎ 9418429574

☎ 9418329200

☎ 9418411199

☎ 9418904168

☎ 9418721336



अक्ल आई पर चरे आई

बबिता, ग्रा चौकी

यक ग्रां थिउ। तेस ग्रां कुई सुआ ना पढातेथ। तेस ग्रां दुई धणि जुएली थिए। तेन्के टाइ गभुर थिए, दुई कुई त यक कुआ थिआ। तेन्हि अपु बोडी कुई मीनाक्षी चौथि तकर पढाई त तसे ब्याह कइ छड़ा। तदिया मठड़ी कुई सपना त कुआ सचिन पढुण लगे थिए।

यक रोज तेन्के ई-बोउ गी बिशो थिए त दुहे गभुर दौड देन्ते एई गे। सचिन बोलु, 'बोउआ-बोउआ! अउं पास भोई गा'। तोउं सपना बोलु, 'बोउआ! अउं बी पास भोई गई'। तोउं ईए कना जे खिरक कइ अपु ईया जे बोलुण लगी 'ईया, पता असा ना, अउं अपु क्लास अन्तर फास्ट अओ असी'। ईये-बोउए दुहि जेई शबाशी दिती! ई बोलुण लगी, 'अच्छा! अउं तुसी जे कि खाण जे आणती?' ई बोलु कइ ई अन्तर घेई गई। बोउ, कुआ जे बोलुण लगा, 'अच्छा कोईया, अब तोउं छठि क्लास अन्तर दखला नेण असा। तोउ जे कितबी बी अण्ह असी'। सचिन बोता, 'आ बोउआ, अब्बल बैग बी अण्ह असा।' सपना अपु बोउ जे बोलुण लगी, 'बोउआ, यक बैग मोउं जे बी अण्ह'। बोउ बोलुण लगा, 'कुईए, अब तु बैग केआं की कती'। सपना हैरान भोई गई त अपु बोउ पुछण लगी, 'किस बोउआ, मोउं कि कितबी हथ अन्तर नी कइ स्कूल घेण ना?' बोउ बोलुण लगा- 'ना कुईए, अब तु स्कूल ना घेन्ती। सचिन अकेला स्कूल घेन्ता'। सपना 'पर बोउआ, अउं त क्लास अन्तर फास्ट अओ असी। भऊ त सिर्फ पास भो असा, फिर बी तेस स्कूल लघाण लगे असे, त मोउं किस नेई लघाण लगे? ऊ-ऊ अउं बी स्कूल घेन्ती।' सपना रोलअछि कइ बोलु। बोउ बोलुण लगा, 'कुईए जिद ना कते। तेई त फिर बी पंजमी तकर पढू। अपु देई मीनाक्षी हेर! से त असी सिर्फ चौथि तकर पढाई त से आज अपु गी सुख जोई बिशो असी। गा घेई कइ अपु ईया जोई कम कर।' सपना नराज भोई कइ घेई गई। बोउए सचिन जे बोलु, 'चल कोईआ, अस बजार घेन्ते त तोउ जे बैग त सपना जे गुड़िया आणते'।



ओ मीनाक्षी धाणि अराख पी कइ गी आ त मीनाक्षी जे बोलुण लगा, 'मीनाक्षी, ओ मीनाक्षी, कोठि असी? मीनाक्षी जबाव दिता 'इठि असी, अउं आई।' मीनाक्षी धाणि फिर हक दिती, 'बाहरी आई! दुक लगे असी, रोठि दे!' मीनाक्षी अपु धाणि धे रोठि दिती त बोलुण लगी, 'शुणते ना, मोउं दवा आणहण जे रुपेई लौते'। मीनाक्षी धाणि लेहरी कइ बोलुण लगा, 'ओ मोउं केई फालतु पैसे नेई, तोउ जे दवा अणता रहेता।' मीनाक्षी डरारी बोलुण लगी, 'तुस सोब पैसे अराख जोई मुकांते, मेई मांगे त ...।' तसे धाणि बोलुण लगा, 'ओइ अराख पीता त अपु पैसी के पीता। तै की घेन्तु? सुआ भाषण देण लगे असी। बोती अराख पीता। दवा लुओ त अपफ पैसे कमा। पर तु पैसे कीं कमांती, अनपढ जो असी। सुनीले जुएली हेर! मेहने 15 सौ कमांती। उओ गा अठिया, मोउं उंघिण दे!' मीनाक्षी अपफ कोसण लगी, 'हे भगवान! मोउं कि करुण, को घेण? रोज शुण-शुण कइ तंग भोई गो असी। अउं त ज्यदा पढो-लिखो बी नेई कि कम कइ सकूं। पर अब पछताई कइ की भुन्तु, जपल चड़ी बग चुग गई।' तसे लिएबु ठटि शुणी बिशो थिआ। तेन बोलु, 'भणिए



पछता नऊ। बोते अक्ल अई पर चरे अई। तुस बी कमाई सकते'। मीनाक्षी बोलु 'पर भैया कीं? अउं त सिर्फ चौथि पढो असी।' लिएबु अपु भणि जे बोलुण लगा, 'सरकारे हें ग्रां यक शिक्षा केन्द्र खोलो असा, जेठि तुस अगर पढ सकते। होर पढण जोई साते-साते इ कमी के ट्रेनिग बी देन्ते जेसे बेलि तुं कमाई बी भुन्ती। अस जे बोते यक कम दुई काज।' मीनाक्षी बोलुण लगी, 'तुस ठीक बोते। अउं बी एन्ती मोउं तठि घिन गा।' लिएबु बोलुण लगा। 'अ त ठीक असु भणिए। पर तुस अपु बोउ बी समझाण दिए ताकि से तुं मठड़ी भेण जोई बी ई ना करीयल पर खरे पढाल-लिखाल।'

मीनाक्षी बोलुण लगी, 'ठीक असु, अउं शुई घेई कइ अपु बोउ समझांती।' लिएबु बोलुण लगा 'अच्छा भणिए, अउं घेन्ता में बोक पुठ ध्यान दे।'

मीनाक्षी अपु बोउए गी गई त तठि सपना दुवार केई खेलण लगो थी। सपना अपु देई काई त हक देण लगी, 'देई एई गई, देई एई गई। ईया हेर देई अओ असी।' ई बोलुण लगी, 'ओई कुईए, कीं असी? मीनाक्षी बोलु 'ठीक असी, ईया।' बोउए अपु कुई मगरी पुठ हथ रख कइ बोलु, 'कुईए तें चेहरा कि उतरो ई लगो असा। बोल की बोक असी? सोब ठीक असु ना?' मीनाक्षी बोलुण लगी, 'सोब ठीक असु, पर यक कमि असी।' बोउए बोलु, 'कुईए, सोब किछ त दुतो असु तेन्धे।' मीनाक्षी बोलु 'से सोब त ठीक असु बोउआ। पर तुसी पढ़ाई-लिखाई केआं अउं दुर रखी।' बोउए बोलु 'पर कुईए, असे की जरूरत असी? मीनाक्षी बोलु 'असेरी त सोभि केआं ज्यदा जरूरत असी। अगर तुसी अउं पढ़ाओ-लिखाओ भुन्तीथ त आज मोउं जे बोक शुणी अओ असी से ना शुणी एन्तीथ।' बोउए बोलु, 'अब की भोई सकतु?' मीनाक्षी बोलु 'मोउं त में लिएबु नोई बथ हराली, पर अउं चाहंती कि तुस सपना जोई ई ना करे।' बोउए बोलु 'ठीक असु, कुईए। अउं अस शुईए स्कूल लघांता।' सपना सोब बोक शुणु त खुश भोई कइ उछड़ती-उछड़ती बोलुण लगी 'अउं शुई स्कूल घेन्ती! अउं स्कूल घेन्ती!'

शरारत छूट गई

Source: Internet

तनि सुआ शरारती कुवा थिआ। रोज ग्रां बाड़े शिकायत घिन एन्तेथ। संजु कुतर घोड़े बड़ दीती, मीना अन्टी कुकड़ बाहरी लई छड़े, चड़ी-चखुरु सोब गुलेल बड़ घायल कइ छड़े। मन्नु खिलौने टोड़ छड़े। रोज तसे शिकायती बड़ तसे ई-बोउ परिशान भोई गो थिए। चैन जोई बिशुण जी तेन्हि वश अन्तर थिउ नऊ।



यक रोज लहाइ पुठ बिश कइ से पढ़ण लगो थिआ। पढ़ते-पढ़ते तेस उंघ एई गई। सुपने से यक दरिओउ केई पुजा त तेठि केनि तेस ढाका दी छड़ा। से पोअण अन्तर डुबुण लगा। इए-ओ हेरु त कोई ना थिआ। से हक देण लगा, बचाए! बचाए! लेयार दी-दी से बेहोश भोई गा। तिखेई सुआ चड़ी-चखुरु तठि कठे भोई गो। तेन्हि सोभि मी कइ से बाहर कीढ छड़ा। तसे पेठ केआं पोअणी भीं कुदु त से सलीयेर छड़ा। थोड़ी देर बाद तेस होश एई गई। तोता, मैना, चड़ी, घुगी, अलण तेन्हि सोभि तस जे शिकायत कइ कि बोलुण लगो 'हेर तनि! होरी बुरु करणे बाड़े कीं हाल भुन्ता। तेई हमेशा चड़ी-चखुरु त जीव सोब मारे, घायल किये त कैद कर कइ तेन्हि दुख दिता। फिर बी असी सोभि तें जान बचाई।' 'मोउं माफ करे दोस्तो।' तनि झूठ खड़ीगा त माफी मगण लगा। माफी मगते-मगते तसे मगरी शर्म बड़ उण कुशी गई। तोता बोलु 'तउ इ की माफी मेंती। तउ त जंगले राजा शेरे



अदालत अन्तर हंठुण एन्तू।' शेरे नउ शुणते त तनि धुप फट गई। तनि जोरी-जोरी लियार दीती, बचाए! मोउं शेर खाई छता।' तनि हक शुण कइ तसे ई-बोउ दौड़ दी कइ लहाइ एई गो। 'की भु कोईआ! की भु?' तसे ईये डर कइ बोलु। तनि अपु ईया जे बोलुण लगा, 'ईया अउं अब कदी शरारत ना कता। चड़ी-चखुरु बी कदी गुलेल बड़ ना मारता। मोउं माफ करे।' तनि अपु ईये कियाड़ी शची गा। तनि बोउए बोलु 'शबाश कोईआ! तु त सोभि केआं अब्बल कुआ बण गा।' तोउं टहो जेई हसण लगे।

यक मोटे मेहणु अपु दोस्ते जे बोता...

बबीता, चौकी

अचेली अउं दौड़ लगो असा। यक बोक बोल! पी.टी. ऊषा जे अगर उड़नपरी बोते त जपल अउं तेज दौड़ुं त मोउं जे की बोते?



दोस्त! उड़नखटोला।

ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574



एडस बीमारी इन्सान जोई यक लिंगि सम्बन्ध बणाणे बोलि केसे बी एडस एई घेन्ता... काँडोम सिर्फ 18% सुरक्षा कता... एडस मेहणु के जिसम अन्तर कम से कम 7 केआं 10 साल तक कोई लक्षण नजर न एन्ते।